

20 OCT 1999

Agong-Indonesia

SERI PADUKA UCAP TAHNIAH KEPADA PRESIDEN BARU INDONESIA

KUALA LUMPUR, 20 Okt (Bernama) -- Yang di-Pertuan Agong Sultan Salahuddin Abdul Aziz Shah hari ini mengucapkan tahniah kepada Abdurrahman Wahid yang dipilih menjadi presiden Indonesia yang baru.

"Beta bersama-sama Raja Permaisuri Agong (Tuanku Siti Aishah) dan seluruh rakyat Malaysia menyampaikan salam takzim dan mengucapkan setinggi-tinggi tahniah di atas pemilihan Yang Mulia bapak sebagai Presiden Republik Indonesia yang keempat," titah Seri Paduka dalam perutusan tahniah yang dikeluarkan oleh Istana Negara petang ini.

Seri Paduka percaya di bawah kepimpinan Abdurrahman, negara dan bangsa Indonesia akan dapat membangun dan mencapai kemakmuran dan kesejahteraan selaras dengan kehendak dan aspirasi rakyat Indonesia.

"Beta berharap bahawa dengan kebijaksanaan Yang Mulia Bapak, hubungan silaturahim dan persaudaraan yang erat yang sudah sekian lama terjalin antara kedua-dua negara dan rakyat kita akan terus berkembang maju demi kesejahteraan bersama," titah Seri Paduka.

Dalam pemilihan oleh Majlis Permesyuaratan Rakyat (MPR) hari ini, Abdurrahman, 59, atau lebih dikenali Gus Dur mendapat 373 undi untuk menewaskan Megawati Sukarnoputri yang mendapat 313 undi.

Perdana Menteri Datuk Seri Dr Mahathir Mohamad turut mengucapkan tahniah kepada Abdurrahman di atas pemilihannya sebagai Presiden Indonesia yang keempat.

"Saya bersyukur kerana proses pemilihan dapat dilaksanakan secara aman mengikut Perlembagaan Republik Indonesia," katanya dalam satu perutusan lain yang dikeluarkan Wisma Putra.

Dr Mahathir berharap hubungan silaturahim dan kerjasama erat yang wujud antara Malaysia dan Indonesia dapat diterus dan dipertingkatkan dalam semangat kejiranan untuk kesejahteraan kedua-dua negara khususnya dan rantau ini amnya.

Beliau yakin dengan pemilihan ini, Abdurrahman akan dapat memberikan kepimpinan yang efektif dan dinamik dalam usaha menyatukan negara dan rakyat Indonesia dalam mencapai kemajuan dan pembangunan di alaf baru.

"Saya berdoa semoga Allah memberikan kekuatan dan kesabaran kepada Yang Mulia Bapak dalam menempuh segala cabaran ketika melaksanakan tanggungjawab yang murni ini," katanya.

-- BERNAMA

MAM LAT